

OLA


PULETINI A'OGA

20 IULAI 2015 ~ LOMIGA 21 ~ UPEGA TAFAILAGI: www.ola888.com ~ TUATASI FESOOTA'I: saili.niupac@gmail.com; evaleon.books@gmail.com ~ E le faatauina ~ A FREE PUBLICATION

e faasoa faamatalaga mo a'oga i le gagana Samoa

www.ola888.com

Suesuega i le faamatai



Tala Faasolopito

Ripoti o le Vaiaaso

Se leoleo mamoe fou mo Moataa



Faasoa o le vaiaaso



~ Tusiga tala ~

E fiafia e faasilasila atu la tatou tauvaga tusigatala mo le faailogaina o le 5 tausaga o le OLA Puletini Aoga.

E tolu vaega e faaulu mai ai:

1. tauvaga a le fanau a'oga, Tulaga lua
2. tauvaga a le fanau a'oga, Kolisi
3. tauvaga soo se tasi

Ulutala: Pule oe i lau ulutala

Umi o le tala: 700 i le 1500 upu

Gagana: Samoa

Aso e faagata ai: 6 Setema 2015

Lafo mai loa i le tuatusi:

evaleon.books@gmail.com

Poo le Itavita8@gmail.com

O le a saunia ni faailoga lelei.



Faailoga: E fia faailoa ma le faafetai galuega ma meatotino a isi e ana puleiata o ata ma faamatalaga o loo ua nonoina e le OLA mo lana lomiga lona 21. E faamanatu atu ai ma le faaaloalo le taua o le puipuiga i lo latou faaagaina i ni faiga e soli ai le tulafono.



FAAMANATU: O se ata lenei na tusia e le tusiata o se malae taalo mo le fanau, o le a fausia lea i totonu o le taulaga o Kalaiesetete. O le a avea ma se faamanatu mo ni tamaitai tusitala lauiloa a le taulaga, Margaret Mahy ma Elsie Locke. O se vaega o le fanua lea sa faaigoa i le igoa o Elsie, a o lea ua faaopoopo i ai le igoa o Margaret. Ua fuafua ia mae'a le galuega i le Kerisimasi.

O le sola a le lanu pa'epa'e ma itu e le lelei ai mo le fanau

O Hillmorton High o se tasi a'oga i le taulaga o Kalaiesetete e feoloolo se vaega o a tatou tamaiti e a'o'oga ai. O se tasi foi o a'oga ua molimauina ni suiga iloga i totonu o se 30 tausaga ua tuanai, ma faatele'a'i i le tula'i mai o mafui'e na satia ai le taulaga.

Faapei o isi a'oga a le taulaga o togalaau, sa faumalo le lanu pa'epa'e mai le amataga. Alu a'i sui malie le fausaga o fuainumera e mafua i suiga o le taimi ma le fegasoloai o tagata e fai atu ma alala i le taulaga.

Ina ua mae'a le mafui'e ona tula'i mai lea o nisi foi suiga o'oo'o lea ua le mafai ai ona toe alofia le tuufaatasia o fanau a'oga.

O fanau eena ua faamalosia

ona ulufale i a'oga sa na o fanau papa'e sa fai mo latou. E faapena foi fanau papa'e ona poloa'iina e ulufale i a'oga eena, poo na e maulalo fuataga o tesile.

E taofi eseese matua e tusa i nei suiga. O iai i latou e manatu o se mea lelei le fefiloi o tamaiti. Muamua, e faamasani ai fanau ma tamaiti o isi lanu ma aganuu, ma maua ai e i latou se a'oga i le olaga e le maua e i latou i se siosiomaga e agatasi. E iai le ulugalii o

John Adams ma lona toalua o Rachel. Na laua filifilia Hillmorton e fa'aaoga ai la la fanau ona o le mafuaaga tonu lea. I Hillmorton e 20 pasene o fanau o Maori, 15 pasene o Pasefika, ma le 55 pasene o Pakeha.

Faamaonia e le tamaitai pule o Ann Brokenshire le suiga ua iai, peitai na ia ta'ua o se mea lelei.

E ese lea lagona mai nisi matua o loo ua alofia a'oga e lata ane i nofoaga e nonofo ai, ona faapea o a'oga e maulalo tesile, poo na foi e toatele le aueena e a'o'oga ai. E faapena foi i nisi matua Pasefika e alofia a'oga eena e lata ane, ae ave a latou fanau i a'oga e manatu e popoto ai le fanau.

Na tautalagia lenei uiga i se pepa a le PPTA, na latou faatusaina ai i faiga na sa fai i Aferika i Saute, e lei mamao atu.

O nisi o tagata lauiloa a Niu Sila e pei o le alii faasalalau o Mike Hosking, latou te lagolagoina le finau e lelei mo le fanau le ulufale i a'oga o aganuu fefiloi.

O Hosking, Seven Sharp TV1, sa a'oga i Linwood High i Kalaiesetete.



Ripoti o le Vaiaso:**Amata le mafutaga a Moataa ma la latou feagaiga fou**

O le taeao sa talosia e le ekalesia, i ona tulaga tofi i le aiga o Keriso, o mamalu lava ia auā le susu o le toeaina o le matagaluega ma ona tulaga tofi, e aulia le mamoe aupito itiiti o le lafu. O paia foi faaleatunuu auā le afio o Tofaeono ma Tama o Asi ma Patu, le toalua na ta'i ma le Nofo Ituaiga ia Fuata.

Ua asoa le sailiga a Moataa mo so latou tofi e tausia le soifua faaleagaga, a o lea ua iu le filifiliga i le susuga ia Semikueva 'Simi' Faatoafe ma le Faletua ia Vesia Upu Faatoafe.

O se aso lagilelei lea Aso Toonai na feiloai ai le faifeau tofia ma lona nuu filifilia. Sa alii taeao tapaau ma le afioaga auā le sii mai o le fala siigata, i lena itu sa molia atu le faifeau i lana galuega fou.

Na matauina ma le toto'a le faatinoga o le osiga feagaiga, e pei o le tu e afua mai i le EFKS lava ia. O le afioga ia Asi Blakelock na saunoa mo le ekalesia, e faaopopo i tomatou faaleagaga mai uso faifeau sa faisao i le sauniga.

Sa alo foi i tulaga masani o le faaaloalo e masani ai aso faapea.

O le Tofa ia Tamapua na fetalai auā le taeao fesilasilafai, a o le fetalai a Tevaga na faia se upu auā le aumalaga ma e na molia atu le alii faifeau ma lona faletua.

Na molimau le afioga ia Asi, o se ua tuua i le ekalesia i Moataa, e lei faigofie le sailiga, peitai ua tasi lava le filifiliga ia Faatoafe ma le faletua. O le mafutaga a tina sa latou faatuina le suafa o le alii faia'oga.

O le faifeau ma lona faletua e afua mai i le alalafaga o Leauvaa. Sa a'otauina i Malua ma malaga atu ai e faaauau le a'oga i Fiti i le A'oga Tusi Paia i Suva. Ona toe taliu mai lea ma galue o se faia'oga i Malua. I lea foi taimi sa laua tausia ai le galuega i Leauvaa. E talia nei le valaau a o loo faaauau pea lea tautua mo lo latou nuu.

I le saunoaga a Asi na ata mai ai se finagalo o le ekalesia e tusa i o latou faanaunauga.



“Matou te manana’o i se faifeau e fagaina o matou agaga, e fafia e alu e asiasi i aiga uma o le ekalesia. E su’e atu o loo iai i le fale o le galuega.” Ma nisi o tomatou taua sa taosoina ai le leoleo mamoe.

O Moataa o se tasi o afioaga o loo tausia pea tapu mai anamua, e pei o le tasi o le tapuaiga i le EFKS e oo mai lava i lena taimi. O iai ni isi e ese a latou tapuaiga, ae mafai lava ona lolotu tausavali i ai.

O le Aso Sa na sosoo ai na ta’ita’i ai e le alii faifeau fou lana lotu muamua.

Na faaalua foi le agaga fafia i le toatele o le aulotu, o le lagolagoina o lo latou ta’ita’i fou faaleagaga.

Lipotia e Saili Aukuso

TALA VAIASO**O se su'esu'ega i le faamatai i atunuu i fafo**

O le vaimasina na se'i tuanai atu na asia ai ni atunuu se tolu ma ni taulaga se lima e se faigamalaga mai Niu Sila.

O le faamoemoe o le asiasiga o le sailia lea o le aai o finagalo o le mamalu o Samoa o loo nopi'a'i i nuu ese, faapitoa i le faamatai ma lona faatinoga i fafo atu o Samoa.

O e na siligia ma suesueina o matai o le aganuu, aofia ai itupa e lua.

O le aumalaga o ni faia'oga o le lunivesite a Aukilani, sa ta'ita'ia e Misatauveve Melani Anae. O isi sui o le tofa ia Malepeai Dr Ieti Lima, Dr Falaniko, ma le afioga ia Muliagatele Vavao Fetui.

O atunuu na asia o Ausetalia, Amerika ma Hawaii. O nisi o taulaga sa afea e iai Sini, Los Angeles, San Diego, ma Honolulu i Hawaii.

Saunoa Fetui, o se uluai suesuega lena ua faia i le faamatai i se tulaga e faavaomalo lona uiga. E moni o iai ni suesuega sa faia ae ese foi a latou faamuamua.

O lena la suesuega e faaauau pea lona faiga, ma o le a toe asia nei nofoaga i le isi lua tausaga oi luma, e ono asia foi Samoa ina ia mafai ona faatusatusa faiga.

E tele ni itu lelei o lena saililiga, e pei ona maua i finagalo faaali o le aumalaga, muamua, o le a mafai ai ona mataituina taulumaga o le faamatai i le lalolagi i se ata lautele ma manino.

O le a avanoa ai le ausuesue e tilofa'ia aga ma uiga o lona faatinoina ma le faaagaina e o tatou tagata i soo se mea ua talafaaauto ai.

O se poloketi a le iunivesite i lona lala Pasefika, e tusa ma se \$800,000 se tinoitupe o loo faagaoioi ai.

O le feagaiga faa-Samoa ma lona uiga faaletalalelei

E tele uiga o le upu i le aganuu faa-Samoa ae tulagaese foi lena i le va o le tuagane ma le tuafafine. O le ata o le tuagane e puipui ma tausi lona tuafafine lea e faavae mai ai le feagaiga ua osia i le va o le faifeau Samoa ma lona nuu.

Na maua se avanoa lelei e faatalatalanoa ai le susuga i le toeaina o le EFKS, Siolo Tauati, i le mataupu. Na ia saunoa e faapea, e le o suia lava le uiga o le upu feagaiga e

pei ona tausia ai le va tapuia o le faifeau ma lona auaga lotu.

O le nuu o le tama, o ona nafa o le puipui ma tausi lana feagaiga. A o le feagaiga o le pae ma le auli, lea e fetalai ai ma le Tala Lelei i le nafa o le faifeau, o le na te faalaulelei le ala, e mafolafola ai ma lelei mea e fai a se aiga lotu. E fefaamoemoea'i itu e lua mo le manuia o le va nonofo ai.

Ae pei lava o tulaga i aiga, e iai taimi e manunu ai le to'au ma tulai mai ai ni eseesega. I le aiga Samoa e masani ona pupulu matua. I le ekalesia e

faia lea galuega e le vasega o toeaina ma le ekalesia. Ae afai lava ua le masuiga malie le sailiga mo se faaleleiga, ona tatala loa lea o le feagaiga.

Saunoa le toeaina, e iloga le taua o le ie o le feagaiga, auā ua ave nei ma se ta'ui paia e molimauina upu sa fai, o loo afifi ai foi ma faanaunauga o itu e lua, faatasi ma e o loo tapuai ma faanono manu, ina ia tau lau o le faamoemoe: ia tausia le feagaiga, ma ia nonofo fealofani feosiosia'i, seia taumavae i le pule a lē ana le galuega.

Faasoa o le Vaiaso:

E lele le manu mai lona ofaga, i ona lava fulu



Faatili Iosua Esera
Puleaoga Sutton Park

UPU TOMUA

Tatou mua'i ave mea i Matautu Sa ma tatou faafetaia le alofa o le Atua ona o lana pule faasoifua o lenei ua tatou saa i maa-o-malie ma tatou oaoa i faleseu. O i tatou sa vao eseese i le aso ananafi, ae o lenei ua tatou fuifui faatasi, ua tatou so'oso'o tuli, so'oso'o tau'au. O lenei ua ta'ita'i mai lo outou soifua ma lo'u ola, ua tatou fesilafai i vaelupe maua, ae le o vaelupe sa'a, ma tatou fetapai i lagima ae le o le lagilagia. Aua e ui i se tofa iina ma se manatu o lo'u tagata, o le foe e faaee i le tau, e fai ae tafea. Ma e leai se e faaoloolo fala, pe na te fulisia le pule faitoatasi a lo tatou matai i le lagi, i lou soifua ma lo'u ola. O lana pule to, o le maa e togi faato, o le tao e velo i le maninoa, o le ta e le agaia. O lea ua tatau ai ona tatou fa'afo'i le viiga i lo tatou Atua ona ua ia puipui ma faasao i o outou soifua ma lou nei ola.

Ou te faatulou atu i sa ma tapu o fanua ma maota, ma ou faamalie atu ona o le a le o'o se tautalaga i ou outou sa ma o outou itu taulagi. E iai le talitonuga maua, o Samoa o le sa ua ma'ea ona paelago, o le i'a o le gataifale ua uma ona aisa, o le Lupe o le foaga ua iloa ona tufa'aga. O Samoa ua uma ona tofi. O paia ma mamalu ua loa ona tofosi ma lalaga fa'afala o 'auafa. Ae tau ina ia ou lafo se fulu i le ava na i Utumalama, ne'i mea ane ua fai ma lape o le tautalaga ou te fa'apea atu ai; Tulouna 'oe Lufilufi ma paia e te tausi. To'o o Lalogafu'afu'a ma le Faleatua. Tulona Malie ma Vaito'elau ma paia e te Tausi. To'o o Tuisamau ma le Faletuamasaga. Tulona 'oe Leulumoega ma paia e te tausi. To'o o Mauga ma Nu'uausala ma le Falea'ana. Tulouna oe Safotulafai ma paia e te tausi. To'o o Fuifatu ma le Falefa'asaleleaga. Tulona 'oe Saleaula pa paia e tausi. To'o o Vaitu'utu'u ma le Gaga'emauga. Tulouna 'oe Safotu ma paia e te tausi. To'o o Figao ma le Gagaifomauga. Tulona 'oe Palauli ma paia e te tausi. To'o o Vailoa ma lou Faleletaua. Tulouna 'oe Satupa'itea ma paia e te tausi. To'o o Faletoi ma le Falesalega. Tulouna 'oe Vaisigano ma paia e te tausi. To'o o Mati'amati'au ma le Faleasau. Tulouna 'oe le Faleagafulu ma paia e te tausi. To'o o le Faleiva ma le launiu na saelua. Tulouna 'oe Malaetele ma paia e te tausi. To'o o le Faleula ma Fa'atuiolemotu.

FA'AFETAI FA'AALOALO

E momoli atu le faafetai i le Komiti Tapena ona o se tofa na a'e, i le filifilia o a'u ou te faasoa atu se iloa o lo'u tagata faatauva'a, e faamanogi atili ai le lolo o lo'o tau ao ni manogi, ma faaoa atili ai le utu a le faimea ina ia utu pupu. E momoli atu le fa'afetai ma fa'amalo ia te outou i le faaavanoaina mai o outou taimi tatou te fetufaa ai. Talosia o le a outou maua ai se manatu a o outou feagai ai ma le galuega o le aotauina, fa'aaupegaaina, faatamaoigaina ma le fa'afuluina o alo ma fanau Samoa, fausia se lumanai manuia mo i latou, ma o latou aiga. Ae silisili ai se lumanai matagofie mo Samoa, Aoatearoa ma le lalolagi atoa.

E seu lili'a, seu matamuli se tala ona o le tou sa e mafa tautai, a o sa lava o le loloto ma le si'isi'i o tua'au ae o lenei ua tau fa'aofi atu ma le paopao o le aloalo. Ae mafai ona fa'apea atu, tatou aleaga a pi'i ama, taualo fa'atasi mo se taunu'uga e silisili ese lona matagofie. Ia pe o lenei fa'asoa, ia tatou fulu e tasi ma felele fa'atasi, ona asaasa mamao lea ma maua le taunu'uga o le tatou tautua.

O LO'U FA'ATAUVAA

Tau a ina ia motu le pa aua iloa lona fausaga ma lona amataga. Atonu o le avea lea ma itu e tou te amanaia ai ni motuga-afa a lo'u tagata. O lo outou silafia o le lalolagi sa fa'afaiilele ma fa'afuluina ai lou nei tagata. Ia avea lo outou silafia o manatu, mea sa tutupu, ma a'oa'oga sa ou maua, ma avea ma fa'apogai, tapasaina ma ta'ita'ilimaina ai se tautua sa ou faia ma o lo'o fai pea.

Matai: Fa'atili Lotofaga

E taua ia te a'u le fa'aaloalo a sul i ma feoi o le suafa lenei ua ou tauaveina, ona o le fa'atuatua o lo'u tagata e fai ma fofoga o le Aiga Salevalasi, le Sa'o Fa'apito ma le aiga Sa Fiamē, ulua'i sa'o tama'ita'i, le tupe na tanoa, Sitagata ma lona aiga. Aemaise le Usoalii ma Alala Maota, le matua ma le ali'i-o-aiga, le lauga a aliimau o faleupolu ma le faleatua. E to'aititi ua ave i ai lenei fa'aaloalo ma o se pale ou te tauaveina ma le agaga maulalo.

Nu'u: Lotofaga, Taelefaga, Satitua, Satalo, Vaovai, Sapapali'i, Poloa.

"mafauauga o le vaiaso"

Ua taia le logonoa i pesega a manulele.
Upu a Samoa. Faamaui i tusi

Tulimanu o Pole:

Afa vivili, fanau faapitoa pi a Siaki ma Puluto



Ia, talofa tamaiti, malo foi le soifua matua, o lea foi ua toe amata le a'oga, ia faamalosi mai tatou. Ae o la'u lipoti foi lenei o mea sa tutupu i lona vaiaso.

Ia, ua silasila le mamalu i tala lata mai o le TV. Matautia le to'asa o le savili. E faitau afe aiga ua motusia le paoa i le tele o vaega o le atunuu. E lei atoa mai se lipoti ae talosia le saogalemu o fanau ma aiga uma.

Ua molia se faia'oga i le fai o ana pisinisi ma fai foi le a'oga a tamaiti. Ua faamaonia na ia faia ni fesoota'iga faapisinisi i lana telefoni i taimi faigaluega. E iai le isi ana galuega. Maeu foi le atamai o lea faia'oga.

Malosi ni faitioga i le malo i le le vaaia lelei o fanau i le vasega o manaoga faapitoa. E \$6.6 miliona fai mai e tatau ona totogi atu e le malo ia i latou nei. Ia, ou te auai ma le atoa i lenei talosaga.

Manaia le fono a le SAASIA lea sa talatalanoa ai i auala e momoli ai le amio ma le faasinomaga i fanau iti. I la'u faalogo atu, e mamao le lele a le manu e lele i fulu Samoa. Faitau ane le tatou lauga lea e i autafa e te iloa ai.

O la'u tala fiafia o le manumalo o le maile i le Britain's Got Talent, faapea foi le taumafai o le Manu. Ia, aua lava le fai mai e oona le fuivine. Oso ma saga oso, e ui lava ina pa'i i ai.

Manatua le tala i le pi a Siaki! Tipi le pi pa'u ifo le sau'ai ifi. O le tala lenei i si pepe na tipi sese e se teine e a'oga faafomai lana pi i le seleulu. Faapea lava ia o le uso. Ia, ta te ofo, o le uso e tau i le pute e 'ai ai le pepe, a o le pi e i lalo. O le mea sili, e le o afaina le ola o si pepe, e ui lava ua le iloa lana mea taua. Ia, se'i vaai lelei, e le maua faalua ni pi. Pe oso atu faatau mai se sipea i le faleoloa \$2.

Tala ofoofogia mo tamaiti e fiafia i mea i lugā i le lagi ma le va pogisa. Ua maimoa nei le lalolagi i ata o le paneta o Puluto. Matautia. E iai lo'u taofi o le nofoaga lea e ta'u e tatou o Pulotu. E o i ai agaga pe a tuua le tifaga iinei. Lea foi ua alu i ai Keli Kupa e faatali mai ai i Parataiso.

LAUGA FAATILI IOSUA ESERA

Galuega:

Leififi Intermediate 1978 – 1979 Faiaoga
 Hirangi Primary 1980 Faiaoga
 Turangi Primary 1981 Faiaoga
 Taihape Primary 1981 – 1985 Faiaoga Sinia
 Mangaweka Primary 1986 – 1990 Puleaoga
 Strathmore Park School 1991 – 1997
 Puleaoga
 Raetihi Primary School 1998 – 2005
 Puleaoga
 Petone Central School 2005 – 2014
 Puleaoga
 Sutton Park School 2014 - Puleaoga

Tautua:

NZPPA Sui Pelesetene 2008 – 2015
 NZPF: Ta'ita'ifono fa'aitumalo 1987 ma le 2000
 FAGASA Failautusi Aoao 1994 – 2005, 2012 –
 Pelesetene Aoao 2005 – 2009

E lele le manu, mai lona ofaga, i ona lava fulu.

Sa fetu'utu'una'i manatu ma fefulisa'i mafaufauga ina ua logo mai au e le paia o le Aiga Sa Tuala se tofa na tasi i ai poutu o le SA'ASIA. E ui i le pala'ai, ae sa talia le fanoga ma tau saili ai loa manatu ma lagona. E tele la-oso ma la-goto sa molimauina le va'il'iliga o manatu. Sa talanoa Alisi o le afiafi, i manu laiti o le totogo o malama, mo se ulutala talafegai. Ona o outou e amatamea i le a'oa'oina o fanau, e ese mai ai i totonu o o latou aiga, o lea sa tasi ai se manatu e mulimulita'i i la outou nafa, o le fa'afai-lelega o alo ma fanau, a o le'i ulufale atu i aoga tulagalua. O se ata sa tula'i mai, o se ata o manulele ua sausau fialele, ua fa'a-fetogi, ua apata ma fa'aloloa o latou apa'au, ma ua sauni e lele ese mai o latou ofaga. O se ata fa'atusa tatou te saga mafaufau, vailiili ma fefa'asoa'i i ai, ma sona aoga, mo le tapenaina o soifua ma ola a'oa'oina o alo ma fanau Samoa. O se ata i le felelei solo o manulele, i totonu o lo latou si'osi'omaga, ma fa'amalie mana'oga ina ia ola, ma saga ola pea. E matau lava le eseese o agava'a ma tomali o manulele 'ese'ese e tusa ai ma o latou mana'oga. E fuafua fulu, le fa'avase-gaga, le ituaiga, le tetele po o le laiti, le paepaega, le malolosi, ma le maua'a o fulu, i mana'oga o le manulele. E fuafua fulu i le tino o le manulele, ma e fuafua apa'au, fulu o apa'au, i'u ma le fa'afuluina o le tino, i le matai 'ai, le si'osi'omaga e ola ai, le puipuiga o le saogalemu o lea manulele ma lea manulele.

Le 'Aeto

E faigata ona fa'afulu i fulu o se Fua'o, se 'Aeto. E mana'omia e le 'Aeto ni apa'au malolosi ma le lau tetele, ni fulu malolosi ma maua'a mo le tauaveina o mea-ai i o latou ofaga. E fa'amoemoe 'Aeto i manu vae-fa, i'a, po o isi manulele mo mea-ai. E manaomia fo'i ni apa'au malolosi aua e

matele ina ofaga i luga o la'au, po'o mauga mauaululuga. E mana'omia la e 'Aeto ia apa'au talafeagai mo le lele ma tauave ia mea-ai i ofaga mauaululuga. A fa'aifo to 'Aeto pe a fa'afetogi a latou tama'i, pe pu'eina se meaola, e mana'omia apa'au e mafai ona fegauia'i ma fa'afoliga i se 'u' pe a lele fa'aifo-to. E maoa'e le malos o peau o le 'ea e feagai ma 'Aeto, ma a le talafeagai apa'au ma fulu o apa'au, e le ola lelei ma ola saogalemu le 'Aeto.

Le Fua'o

O le matai'ai a Fua'o o i'a laiti o le gatai-fale, ma e ese le tino mai ma fulu e manaomia e fa'aoeopea ai, ma fa'apau atu ai ma nofo i luga o le sami. E manaomia fulu e vave mamago ma le pi'itia e le sami. E 'ese mai lea ma fulu o manu, e matai'ai i manu o le fanua, ma iniseti. E eseese ituaiga fulu, ese apa'au, ese le paepaega. E fuafua fo'i apa'au ma le galuega e mana'omia ina ia ola saogalemu ai le Fua'o i lona si'osi'omaga.

Ua outou silafia fo'i le 'ese'ese o fulu o manulele fafine mai manulele po'a. E le gata i le fa'atosina a manu po'a i manu fafine ina ia saga ola pea lea ituaiga manulele, ae manaomia fo'i fulu mo nafa fa'amatua a manulele. E 'ese fulu e manaomia pe a ofaofa, fa'afetogi, ma saili ni mea-ai mo manu laiti. Ae o fulu lava ia, ma ona lanu, ma lo latou tino mai, e lele 'ese ai lea manulele mai lona ofaga, ina ua lava taoso, ma utu pupu fulu.

'E le i faia e le Atua se Aeto ina ia fa'afulu, i fulu o se Fua'o, e le ola fo'i se Fua'o i apa'au ma fulu o se 'Aeto.'

O se manatu e le lau maua, ma le taua i tofa manino ma utaga loloto a le 'au su'esu'e i le fa'avaeina ma le fausaga o le atamai, ma le fa'afaiilelega o le mauili o se tagata. E moni e iai le tala fa'atusa a le atunu'u (Samoa) i le nonoina e le 'Isumu o apa'au o le Pe'a e lele ai, ma le toe fa'afuina apa'au o si Pe'a, ae tatou te iloa, e le mafai e le isi manulele ona lele i apa'au o isi manulele. Tatou aumaia se fa'ata'ita'iga o nei meaola o le foafoaga e fa'asoa ma fetufaa'i ai i la tatou tautua o loo fai nei. Ma le iloa, e lele lava le manulele ia mai lona ofaga, i ona lava fulu, ma ona apa'au.

Fesili

i. Ua talafeagai le tatou auaunaga, mo alo ma fanau Samoa, ma nofoaga e felelei ai?
 ii. Ua talafeagai fulu o lo'o tatou fa'afuluina ai alo ma fanau Samoa i Aotearoa, ma taunuuga e fia felelei i ai?

A. E Lele Malie Manulele ua Utu-pupu Fulu

E pei ona taua, e mana'omia e manulele o le vateatea, fulu e talafeagai ma o latou mana'oga, le si'osi'omaga, ma o latou matai-'ai. E tusa fo'i pe talafeagai fulu, ae fa'atoa lele ese le manulele, ina ua uma ona



fa'afetogi, ma ua utu-pupu o latou fulu. E tele le galuega a manu fafine e fai i le fa'afetogiga o a latou tama ina ia mafai ona felelei ese ma le ofaga.

O lanu, tino, ma le fa'avasegaga o fulu, e iloa ai manulele. O le talitonuga fo'i lea mo fanau, ma itu e tauilo ai. O le tele o le fa'afaiilelega o alo ma fanau Samoa, o loo afifi i utuvagana ma lafoga a le atunu'u.

1. E iloa tama a Tausala

O se manatu ma se lafoga e fa'alogoina so'o ma fa'aleo so'o e fa'alagi ai tama ma teine e amio tausea'afia. E fa'afaiilele le tama a le Samoa ina ia iloa amio lelei, amio fa'atama-a-tausala. E taua i le Samoa le a'oa'oina o a latou fanau ina ia tauleleia, ma taulelei ai aiga. Ae pei ona talanoaina e Tofaeono Tanuvasa Tavale, o le musu ma le maasiasi i le ta'uvalea o aiga, le mafua'aga e naunau ai le matua Samoa ina ola a'e lana tama, lona afafine ma lona atali'i, e iloa amio.

O le fausaga o lea amio, e fofoa mai lea i tofa a le atunu'u e fa'afaiilele ai le soifua o tagata. O tofa ia ma manatu ua taua e le to'atele o le au fai tofa ua tataua toe aumai i lumamea, e fafau ai agaga, mauili, tu ma aga a tagata Samoa. Ua fesiligia e nisi le mulimuli i tofa a isi atunuu, talitonuga, tu ma aga masani a isi ituaiga tagata. E pei ona ataata mai i manatu o Misitaveve Melanie Anae, Tuiatua Tupua Tamasese Efi, ua tataua toe fa'ailoa lautele, fa'asoa lautele ia ia tofa ma manatu o tagata Samoa, e fa'avae ai olaga o alo ma fanau Samoa, i soo se atunu'u o loo alala ma aumau ai.

ii. O lou fa'asinomaga, lou ala i malo


E atagia mai i le lafoga lea, le taua tele o le fa'asinomaga o le tagata ola, ma e tele upu o le gagana e afifi mai ai lea tulaga. O loo finauina e Aiono Dr Fanaafi Le Tagaloa, vaega o le fa'asinomaga o le tagata Samoa e ao ona atoatoa i ai lona iloa. I le manatu o Aiono, e tataua i le tagata Samoa ona atoatoa lona iloa i lona tupuaga o loo i lona gafa, matai e suli mai ai, ele'ele ma fanua, le gagana ma le aganu'u. E foliga mai i le manatu, o le atoatoa o le iloa o le fa'asinomaga, o le amataga lea o le atamai. E fofoa mai lea i le manatu o Sokarate, i le taua o le iloa lava e le tagata ia, o lona tagata. E manino mai i manatu o Sokarate, o le tagata e ola ma le pogisa i lona tagata, o se tagata ua ola maumau. O le manatu o Aiono e mafai ona fa'apea e afua mai i manatu o tagata Eleni e pei ona taua i le Tusi Paia, o le ava i le Atua le amataga o le pote. O le tagata o le galuega mamana a le Atua, ona o le tagata sa fai ia foliga i le Atua. O le iloa la e le tagata lava ia,

Faaauau itulau e 6



Sponsored by Evaleon Books

LOUTALA FA'ASOLOPITO SAMOA HISTORY

"Ne'i mea ane na galo"

AC Turnbull

Ata: McKay Family Collection,
Copyright McKay Family Collection

19—25 Iulai

21

2000 Las Vegas. Malo David Tua ia Robert Daniels, tuioti T3

1913 Maliu Emma Coe Forsyth, faipisinisi ta'uta'ua

22

1968 Malilie alii ma faipule o Asau e ta lo latou vao matua e le kamupani gaosi laupapa Potlatch

1967 Molia le ulua'i uta meli i le va o Samoa Kilipati ma Elise e le Polenisia

23

1930 Lafo le talosaga a tina o le Mau i le palemia a Niu Sila e tetee i le faaiuga a le faamasino—sauaga 1929

1993 Malo Jimmy Thunder ia Melton Bowen i le fusi o le siamupini WBF

1884 Lau le sala o le oti mo latou nei: Tutuila, Iakopo, ma se fitafita mai

Aleipata; faalava'au i Mulinuu (Tuvale)

24

1975 Ueligitone. Manumalo Monty Betham ia Carlos Marks mo le fusi siamupini Taupulega a Peretania

25

1953 Amata pu'ega o le ata tifaga *Return to Paradise* i Lefaga; Autu ia Gary Cooper ma Moira Mac Donald

1935 Amata pulega AC Turnbull (Tagapulu) i le tulaga sui ta'ita'i



Seiuli Moira Walker at her home in the North Shore, 2012. Ata Pacific Guardian



Toe foi i Parataiso ananafi

I le tausaga e 1953 na pine ai le sootaga o Samoa ma Hollywood ina ua tulaueleele se vaega o lana aufai ata tifaga e pu'e se ata i Samoa mo le taimi muamua. Faavae i se tala a le tusitala tautaua o James Michener, na autu ia Gary Cooper ma Roberta Haynes ma nisi igoa iloga mai fafo. Ae lagolago i ai le tamaitai Samoa o Moira Walker, Felise Vaa, e faaopoopo i ai le vaega toatele foi lea e faamanaia mai ai le ata i tua. O molimau i le pu'eina o le ata i lea taimi e aofia ai Moira Walker. O se mea fou ia Samoa le pu'eina o se ata ma toe tilotilo atu i o latou ata o loo gaoioi mai. I le 2003 na faailoga ai lona 50 tausaga i Samoa talu lona pueina i le 1953.

O loo matamata ai pea le lalolagi i le ata Toe Foi i Parataiso ona o le amana'ia o le igoa o le alii faitifaga o Keli Kupa—ta'u a toeaiina Samoa na feiloa'i i le alii Amerika. I le ata i lalo nisi o tamalii o Lefaga na muai taunuu i Hollywood, a o le'i tulaueleele le vaalele o Dwayne The Rock Johnson i Samoa lata mai nei lava.



Na maliu Gary Cooper ia Me 1961, 8 tausaga mulimuli ane talu le pu'ega o le ata. I le ata, o Moira o le afafine o Cooper (poo Morgan i le ata), o lona igoa ile ata o Turia.

NIUPAC PUBLICATION

Email: evaleon.books@gmail.com
Phone: (09) 269-6186
Postal: PO Box 43122
Mangere Town Centre, AUK 2153

All rights reserved. This bulletin and its content is protected by copyright laws of New Zealand and international conventions. Except for educational purposes, any other activity pertaining to its use is prohibited. OLA understands the rights of other copyright holders whose material we use and acknowledge always—apart from our own.

NIUPAC 2011

Editors:

Levi Tavita ~ ltavita8@gmail.com
Muliagatele V. Fetui ~ v.fetui@auckland.ac.nz
Saili Aukuso ~ saili.niupac@gmail.com

EVALEON BOOKS & NIUPAC PUBLISHING



Telefoni (09) 269-6186. Emeli: evaleon.books@gmail.com



Tautua e ala i le gaosia o alaga'oa mo a'oga (tusi mo le a'oa'oina o le faitau i le gagana Samoa, tusi e a'oa'o ai gagana, kalena, posters, yearbooks, brochures. E tautua fo'i i le fa'aliliuga o gagana, ma le tapenaina o ni tusi e fia lomia i so'o se sionara o fatuga.

Sponsors:

New Zealand
Lottery Commission

Evaleon Books &
Niupac Publishing

Wheeler's Books
(NZ)



LAUGA FAATILI IOSUA ESERA

o ia, o le a fa'amalosia ai le ola atia'e o lea tagata.

ii.a Suafa matai

E ataata mai i le manatu o Aiono, o se tasi lea o itu taua o le tagata Samoa e ao ona ia malamalama i ai. Ia manino i le tagata Samoa le suafa matai o lona aiga i lea nu'u ma lea nu'u. O se so'otaga taua mo so'o se Samoa e ao ona atoatoa i ai le iloa o le tagata po 'o fea lava e aumai ai lea Samoa.

ii.e Ele'ele ma le si'osi'omaga

E taua i le tagata Samoa le iloa o lona nu'u, lona itumalo fa'apea ma fanua e fa'asino i le matai o lona aiga. E tele sootaga a le tagata Samoa ma nu'u ma itumalo o le atunu'u. E fa'apea ona iai ma le sootaga ma fanua, mea-ola ma la'au, fetu ma paneta ma isi mea o le foafoaga.

ii. Gagana

O le mau a Aiono ma e lagolago e le to'atele, le tatau ai i le tagata soifua le tautalagia ma le mafai ona feso'ota'i i le gagana o lona tupuaga. E foliga mai i le finau a Aiono, e faigata ona taualoa tagata se i vagana ua tautatala ma saunoa mai. Ona o le gagana e eseese mai ai tagata Samoa mai ni isi o tagata Polenisia, ua mausali ai i le manatu o Aiono, o le tautalagia o lea gagana o le tupua, o le tupuaga o le tagata, o se itu taua mo lona fa'asinomaga.

iii. E mamalu tau'ave, maota tauave Samoa

I lea manatu, e foliga mai ai le malaga o le tagata Samoa, mai o latou eleele sa aumau ai, ma tauave o latou maota, fanua, fa'alupega, ma mea uma e iloa ai lona Samoa. E leai se tagata Samoa e alu samasamanoa i se nofoaga. Ua molimauina foi i le aumau ai o tagata Samoa i Niu Sila ma atunuu mamao, le fa'atinoina o tu ma aga e masani ai le Samoa i nu'u ma atunu'u o lo'o auamau ai. E atagia mai i lea manatu le taua tele o le fa'asinomaga o le tagata Samoa, e fealua'i ma ave e pei o sona la'ei.

O loo fa'alateleina atili lea manatu (Esera, Bernstein, Harker) ma e tusitusi, i malosiaga ma fa'amanuiaga o alo ma fanau a'oa'oina o lo'o amanaia ma fa'atauaina a latou tu, aga ma gagana i totonu o aoga. E tele manuia ma i'uga lelei mo tamaiti e tauave o latou paia i totonu o aoga a Niu Sila. O le to'atele o tamaiti o lo'o tauave o latou paia ma mamalu i totonu o aoga, e i'u lelei aoga. O le le fa'aaogaina o le gagana a alo ma fanau mai o latou aiga, i totonu o aoga o se fa'apogai tele lea mo le tulaga mau-lalo o le ola a'oa'oina o alo ma fanau.

iii.a Totoga o mauuli

O le mauuli o le tagata, o se ola ma se malosiaga e afua mai manatu ma tofa o loo fafauina ai le agaga, tu ma aga a lea tagata soifua. O se itu ua finauina e le

to'atele o le 'au fai tofa, e taua i le soifua o le tagata. O le mauuli, o se vaega taua i le fa'asinomaga o le tagata. Ua ta'atele manatu i le tatau ona aumai i lumamea ma fa'alatele ia tofa e fausia ai le mauuli o le tagata Samoa ina ia vailiili, fa'atino i le va o le tasi ma le tasi, le va ma le si'osi'omaga, le va ma tagata e toe fa'afulu ai alo ma fanau Samoa.

E tele totoga o le mauuli o le tagata Samoa ma o le tele o ia totoga, e feso'ota'i, ma fa'amoemoe le tasi i le tasi. E le tu fa'atunutu se totoga e tasi, ae lalaga fa'atasi ma fili fa'atasi. A malosi le tasi, e si'i a'e ai ma isi vaega o le mauuli. O le tuu faatasiga o vaega o le mauuli, o le fa'avae lea o tu ma aga e fa'atino e le tagata. Sa finauina e le susuga i le Fa'afeagai ia Tavita Filemoni o Ueligitone, i lana lauga i le maota o le palemene, i se lotu sa saunia mo le vaiaso o le gagana Samoa i le 2014, ua talafeagai le fai o le vaiaso o le aganuu ma amio Samoa, ona o le toatele o le tupulaga ua le iloa fa'aaloalo ma amio e talafeagai ma tu ma aga fa'asamoa. E toatele e lagolagoina lea manatu.

iii.a.1 Va Fealoa'i

E mausali le taua o le iloa ma le tausi o le va fealoa'i e tagata Samoa. E taua le va o le tagata matua ma le tagata laititi, le tama ma le teine, le tuagane ma le tuafafine, le tane ma le ava, le taule'ale'a ma le matai, le faife'au ma le ekalesia, fa'apea ma va fealoa'i eseese e tatau ona silafia e alo ma fanau. E taua le tofa fetala'i i le va o le tasi ma le isi, ma le talitonuga o le fetausia'i e faigofie ai mea, ma silisili ese le taunuuga ma le matagofie o mea e fai i luga o le va fealoa'i.

iii.e.2 Tautua

E anoanoa'i tautua e fa'atino e le Samoa, ma o se vaega taua mo le mauuli o le tagata Samoa. O le tautua o le faia lea o galuega mo le lelei o isi tagata, e aunoa ma le fa'amoemoe i se taui. Tautua aiga, nu'u, le itumalo ma ekalesia. E tele tautua e fa'atino e le tagata Samoa ma o le tele fo'i e mo le olaga atoa. O le atoatoa o le tautua, o le maoa'e foi lea o mea e fai e lea tagata. E fa'apogai le ola tautua i manuia e tele e maua e le fai le tautua.

iii.e.3 Ava

O se tulaga lea e tulai mai i le va o se tagata ma lona matua, le tagata matua ma le tagata laititi. E iai se manatu o le tagata matua ua tele lona silafia i le tele o mea o le olaga. Ua va'ai, fa'alogi, fa'atino ma iloa le mea lelei ma le mea e le tatau ona toe faia. O le tagata matua ua tele le silafia ma le iloa mai lona fa'atinoina, fa'alogi, fai ma iloa le mea e tatau ona fai mo se taunu'uga manuia. O le ava, o le mulimuli ma le iloa lea e le tagata laititi, o fa'asinoala ma fautuaga a le tagata matua. O le usita'i o se vaega taua lea o le 'ava' aua ua fai ma fa'atino se fa'atonuga ma le iloa ma talitonu i le sa faia le fa'atonuga. E

fa'amoemoe le usita'i i le va fealoa'i, pe a fa'atino ma le amio tonu.

iii.e.4 Aiga

E taua i le olaga o le Samoa lona aiga ma le iloa o le matagofie o aiga e tutu fa'atasi ma fetausia'i. O se tasi lea o totoga taua o le mauuli o le tagata Samoa. O le tofa a le atunuu, e tele a'a o le tagata na i lo o a'a o la'au uma. O le maua'a o le tagata. E afua mai i lona iloa ma fa'apea ona tausi i lona aiga. E va'ava'alua ma le manatu o le taua o le iloa o lou so'otaga i isi tagata ma le laueleele. O le tagata Samoa ma lona aiga, o le aiga ma ona tagata, ma e i'u lelei le tagata e fai aiga lelei.

iii.e.5 Alofa

O se vaega tele lea o le mauuli o le tagata Samoa e ui ina lava e le na o tagata Samoa e fa'atauaina le alofa. Ae o le alofa e pei ona taua i vaega o le mauuli, o le mafaufau a le agaga lea mo isi tagata ina ia manuia. O le alofa e lelei ai le fa'atinoga o mea uma. A aunoa le tagata ma le agaga lea, ona fesiligia lea o le atoatoa o se galuega e fai.

E. E Mamae le Tava'e i ona Fulu

I nei aso i le va'aia ma molimauina le lofituina o nofoaga i ituaiga tagata, talitonuga, tapuaiga, taumafa, tu ma aga, ma gagana eseese, ua molimauina ai le taua o le tagata lava ia. I le lolofi mai o tagata mai atunu'u eseese e fai Niu Sila ma o latou atunu'u, ua fa'apea ona molimauina ai le naunau o alo ma fanau Samoa ina ia iloa e tagata o i latou o tagata Samoa. Ua molimauina le va'aia o fa'atinoga o fa'afiafiaga, talanoa i le gagana, ma le fuifui fa'atasi o alo ma fanau. Ua molimauina i la'ei, tatau, ma le naunau e fa'ailoa lautele o latou fa'asinomaga i le lalolagi.

I. O Manu o le Lauamanu e Felelei Mamao

O manu o lauamanu o matele i manu o le gataifale, poo manu e ma'au i le vai tuloto, vaitafe po o vaivai. O manu e matai-ai i i'a, pe tu'u fua i atunu'u ma eleele e mamao ese ma nofoaga o ola ai. O manu nei e fulu tasi ma foliga tutusa, lanu ma tino tutusa. O manu e felelei fa'atasi ma e matele ina felelei mauululuga, ma fa'amoemoe i le si'isi'i o peau le ea e lele atili ai. E iai le talitonu o le 'au su'esu'e e talanoa manu o lauamanu, ma fa'amalosi'au manu o i tua i manu o i luma, aemaise ai i le manu ta'imanu.


i.a E mamao le felelei fa'atasi

A o va'aia pea le tulaga vale o le taumafai o fanau a Samoa i totonu o a'oa'oga, ua manaomia le felelei fa'atasi o tagata e to'atele pe tatou mo'omo'o ma naunau i se taunuuga manuia. Ua loa tausaga o fa'avae Aoga Amata, SA'ASIA, FAGASA, ni taumafaiga a le Ofisa O Aoga, Matagaluga o Tagata o Atumotu, taumafai a fa'alapotopotoga a faiaoga ma pulea'oga. Ua tele foi tausaga talu ona tusi ma iloilo le Ta'iala, ma ni isi o alaga'oa. Ua sefulu tausaga le matua o le Vaiaso o le gagana Samoa, mai lona amataga mai le 2006. Ua iva tausaga o le tauvaga

Faaauau itulau e 8

UILI FAU UPU

Saili tali o fesili o lo’o i lalo.
Pule oe pe sipela i luma
(clockwise) po’o tua
(anticlockwise).
E sa le feosoosofa’i.



1. Ta’u mai ni soa se tolu
o le *auma* i le Igilisi:

2. Saili ni fausaga o le
upu *taula*.

3. Su’e le upu *taulamua*
tusi sona faamatalaga:

4. Tusi uma upu/
fuiupu e ta’i 4-8
mata’itusi, ma o
latou soa i le Igilisi
(E faitau ai ma upu
ta’ua i le 1, 2 & 3)

Lelei atoa = 12 upu
Lelei tele = 8 upu
Lelei = 6 upu

SUDOKU #21 (TAALOGA I NUMERA)

	4				8	3		
2					3			8
	9		4	5		1		
				6			1	5
5			3		7			6
6	7			8				
		1		9	4		8	
8			5					2
		5	8				4	

Fa’atumu
pusa numera
(tama’i
sikuea) i
fuainumera
1 i le 9.
Ia uma ane le
galuega ua
maua atulaina
ta’itasi
(tu, fa’alava)
o iai le 1 i le 9.
E tofu le
atulaina ma
lona
fa’atulagaga
e ese mai le isi.

FAIGOFIE / FEOLOOLO / FAIGATA

©sudokuessentials

PASO I GAGANA E LUA

Faatumu le paso i upu/igoa Samoa. Fill the
crossword box with Samoan words / names
—unless stated otherwise.

1		2		3		4		5		6
				7						
8								9		
				10						
11								12	13	
				14	15		16			
17	18		19				20	21		22
			23							
24							25			
			26							
27							28			

Faalava~Across

- 1 drifted (5)
- 5 measure (3)
- 7 A village in
American Samoa (5)
- 8 turn (5)
- 9 waterfall (3)
- 10 meeting place (5)
- 11 a character: Book
of Ruth (5)
- 12 drink (3)
- 14 behaviour (4)
- 17 complete (4)
- 20 originate from (4)
- 23 choke (4)
- 24 God address (4)
- 25 rob (4)
- 26 electricity (4)
- 27 large (4)
- 28 heir (4)

Lalo~Down

- 1 talk (many) (7)
- 2 Samoa Airport (7)
- 3 be in demand (6)
- 4 to dip food (6)
- 5 climb up (plu.) (5)
- 6 whistle past (5)
- 13 coconut fruit (3)
- 15 desire (6)
- 16 soap suds (2)
- 18 skipping (5)
- 19 fox (5)
- 21 anxious, fret (5)
- 22 turban snail (pic) (5)



PULUTO LE PANETA: SA’O PE SESE

1. E lapo’a atu lo tatou masina i lo Puluto.
2. Na uluai iloa Puluto i le tausaga e 1930.
3. E aupito mamao Puluto mai le la i lo isi.
4. E leai se vai e maua i Puluto.



POLE MA PAPA



TALI GALUEGA OLA 20

S	O	L	A	A	G	A		A	T		L		L	
A		E		V		T	A	M	E	I	F	U	N	A
S	A	I	L	E	L	E		I		N		L		L
A		U		G		A	L	O	F	I	L	I	M	A
A	T	A	M	A	I		A		A	E		A		
	A		A		L		F	A	G	A	L	E	L	E
M	U	L	I	P	O	L	A		U		E		O	
	L		N				I		S	A	M	O	A	F
F	A	G	A	A	L	U		A		A		L	I	I
A		A		M		T	A	U	A	L	O	A		L
A	U	T	A	A	L	O		N		U		I	S	O
S		A		T		F	A	I	U	M	U		O	
O	L	A	T	A	G	A		A		A		L	A	U
L		G		G		G	A	T	A	L	A		T	
A	L	A	L	A	G	A		U		U		F	A	O

FAAUMA
LE FUAIUPU
O LE PESE:
Samoa patipati
o au auro ma
au penina

© PasoSamoa, 1988



LAUGA FAATILI IOSUA ESERA



tautalaga i le gagana Samoa. E fa'apea taumafaiga a aoga maua i le atunuu atoa, i tauvaga laulausiva, pese, ma'ulu'ulu, sasa, fa'ataupati ma tauvaga tautalaga.

i.e Tatou galulue fa'atasi

Tatou te mafai mea e tele pe a tatou tutu fa'atasi ma galulue fe'oe'oea'i. Ua tatau ona fulu tasi i nisi o mea, a o tumau pea le tu to'atasi o lea fa'ala-potopotoga. Ua o'o mai le taimi ua tatau ona tatou fa'atauaina sini, tofa mamao, ma le tatou tautua. Ia fa'amalosi'au le tasi i le tasi, ia avea le malosiaga o le isi ma fesoasoani e lele ai le isi. Ia lalaga fa'afala ia itu 'ese'ese e malosi ai le tatou mau.

i.o Ia tasi lo tatou leo

Ia lagolago le tasi i le leo o le tasi, aua e malosi ai le tatou finau i luma o le atunu'u, le malo fa'apea ai ma ofisa o le malo. A tasi lo tatou leo e fa'aalologia ai la tatou finau e le atunu'u, le malo ma ofisa o le malo. Ia tautala ma le iloa ma fesoatai ma le lava tapena e iloa ai le tatou mau tonu ma le fe'oe'oea'i.

O. E fulufulu lele le matua alofa

E tatau ona tatou fa'aaloalo i le fiafia pe a latalata mai le fili e ono lepetia ai le ola saogalemu, ma le ola a'oa'oina o fanau, aua o lo tatou lumana'i lea. Ia toa le tatou finau mo mea e tatau ona fa'atino aua le ola manuia o alo ma fanau Samoa ma tagata uma i totonu o Niu Sila nei.

i. Ua talafeagai le tatou auaunaga, mo alo ma fanau Samoa, ma nofoaga e felelei i ai?

E le fa'aititia pe maulalo le fa'asinomaga o alo ma fanau Samoa e fananau i totonu o Niu Sila, na i lo e fananau i Samoa ma Amerika Samoa. E tutusa foi le fa'asinomaga o le afa Samoa ma le kuata Samoa ma le Samoa atoa. Afai tatou se mo'omo'o i se taunu'uga lau tutusa, o lona uiga e tatau ona iai ni eseese, itu ma vaega o le fa'afaileleiga o le alo Samoa e ola ane i nuu i fafo, na i lo o e ola a'e i Samoa. E le o iinei se tali, ae saga iloilo ma fili manatu po'o fea o iai se alafua e tapena mo fesili ia.

ii. Ua talafeagai fulu o lo'o tatou fa'afuluina ai alo ma fanau Samoa i Aotearoa, ma taunuuga e fia felelei i ai?

O le to'atele o alo ma fanau e ola ma soifua a'e i fafo, masalo e to'atele e le toe fo'i i Samoa e ola ai. E le fa'apea ai la o le a sui ai le fa'asinomaga o le Samoa lava ia. O le a se galuega talafeagai mo alo ma fanau ia? Afai o lou fa'asinomaga lou ala i malo, o a ni mea taua e tatau ona atoatoa i ai le ola a'oa'oina?

Upu Muli

Fa'afulu le Samoa i le utu-pupu o lona fa'asinomaga, e afua mai i tu ma aga e fa'aaloalo, fa'apea le gagana e fa'aaloalo. Ia fa'afetogi ma fa'avae o latou mauili, i tofa a le atunu'u o loo afifi i upu ma utuvagana o le gagana Samoa. Ia tatou tutu fa'atasi, leo fa'atasi ma foliga e tasi i le fa'afuluina o alo ma fanau Samoa. E iloa le Samoa i ana tu, ma ana aga aemaise i lana gagana.

Soifua ma ia manuia.

Sa fofogaina i le Fono Faaletausaga a le SAASIA
AUT Iulai 2015

O le OLA o se tautua e fia fai sona
sao i le fa'aaogaina ma le faauualoaina
o le Gagana Samoa ~

Ae mana'omia ona ta'u atu, pasi atu,
momoli atu sana fesoasoani i
potua'oga, aiga, aai, nuu, ma soo se
mea e aoga ai—i soo se itulagi ~

E taua lau fesoasoani.

Faatasi ma isi tausimea a le gagana,
e tasi le faafitiga, ia faaolaola ma
faaaoga pea la tatou gagana, auā
fanau lalovaoa ~

O la ta gagana o lo ta'ua tofi mai le
Atua, e tuufaasolo a tupulaga ~

O le faavae latou te tutū ai ma le
mautinoa, 'ai suiga ma lu'itau a le
taimi.

www.ola888.com

